



新
世
說

新世說自序

宋臨川王劉義慶撰世說新語一書。託始漢魏。終止東晉。摭逸事。宏獎風流。雋旨名言。溢於楮墨。孝標作注。能收錄諸家小史。分釋意義。高似孫緯略。極推其典贍。紀曉嵐則謂其糾正義慶之紕繆。甚爲精核。所引諸書。紀載特詳。裴松之三國志注。酈道元水經注。李善文選注。不是過也。故淹雅碩彥。羣屐少年。皆喜讀而樂道之。後之作者。劉肅倣之爲唐世說。何良俊廣之爲語林。李紹文繼之爲皇明世說。清初王丹麓則著今世說。李鄴嗣又著續世說。其書咸有可觀。然以視臨川王之書。則有間。良以二劉去晉未遠。竹林餘韻。王謝遺風。不啻身親酬酢。掇其語言。而挹其丰采也。予生也晚。幼承先君子耕莘府君庭訓。又從舅氏李少疏先生游。涉獵

於藝林。卽酷嗜臨川王之書。以彼片語隻辭。別具爐錘。自甘吻頰。非凡響所能及耳。長遊東瀛。歸爲議士。益廣交海內賢豪。習聞掌故。輒筆之於冊。以備遺忘。因思前清入主中原。亦越二百六十有八年矣。其政俗之嬗變。朝野之得失。軼事遺聞。更僕難數。顧鐘虞雖移。簡冊猶秘。私家著述。充棟汗牛。豈無記載。詳贍可供參考者。欲求一斟酌羣言。足諧雅俗之作。戛戛乎難之。迨鼎革以後。當代執政。革命偉人。黨派紛拏。互相攻訐。民國記載。亦尠完書。國會散後。留滯燕京。端居多暇。爰不揆禱昧。倣臨川王世說新語體例。編輯一書。名曰新世說。內分德行言語政事文學等三十六門。上起前清初葉。下迄現今。本春秋三世之義。成野史一家之言。品必取其最高。語必取其最雋。行必取其最奇。重實事而屏虛譚。有臧貶

而無恩怨。使閱者流連往躅。雅趣橫生。或疑名賢生平。多嘉言懿行。詎藉此一言一事以傳。不知就此一言一事之微政。如頰上添毫。睛中點墨。但稽已往之陳跡。即可見近日名流逸韻之由來。更可爲他日論世知人之一助。至後之人得覩是書。或覆醬瓿。或亦如今人於臨川王之書。皆喜讀而樂道之。則惟付諸茫茫不可知之數而已。民國七年九月湘潭易宗夔蔚儒作於宣南寄廬。

--	--	--	--	--	--	--	--	--	--	--	--

新世說例言

一是書條目悉遵世說新語原編。惟原編祇分三卷。每卷析爲上下。茲依編輯之便。析爲八卷。

一是書就事論事。如此事可入德行。則德行之。可入文學。則文學之。并非以一事概其生平。勿疑論列之不當。

一世說新語稱爲最多。或以官爵。或以地望。或以名字。是書於名賢或字或號。祇載其最著者。雖至數見。俱各從同。以便省覽。

一是書於先賢稱某公。時賢稱某君。奸佞墨吏。則直斥其名。雖無筆削之權。微寓予奪之意。

一古人著作。如班之於馬。多全襲其辭。以後不可勝數。緣事跡未可憑虛以構。非故襲舊文也。衛正叔之言曰。他人著書。惟恐不

出於己。某著此書。惟恐不出於人。可謂先獲我心矣。

一是書持論務趨平允。近人所著清稗彙鈔。稱洪楊爲盜寇。列孫黃於會匪。固失之偏。而滿清稗史。清宮秘史之類。則又種族之見太深。詆毀之辭過當。茲編一爲廓清之。

一編輯是書時。所資參攷書。不下百數十種。紀載之事。雖未能一一標明來歷。要皆具有本末。其言之繁冗。而蕪雜者。悉翦裁而修飾之。俾歸於簡雅。

一清代名儒分程朱陸王兩派。經學分漢學宋學兩派。古文分桐城派。非桐城派。詩分漢魏唐宋各派。分茅設蔭。入主出奴。是書則並蓄兼收。藉以覘一朝之風會。絕無門戶之見存焉。

一每人於紀事之下。注載姓名里居官爵事略。再見不贅書。有官

者注某某爵里見前。無官者注已見前。

一政事門間列前賢之武功。然祇以對外戰爭爲限。至國內戰爭全不敢紀。以弭同胞殘殺之嫌。

一是書本小說家言。以供談助。而德行方正雅量箴規等篇。修身倫理教員可爲參攷書。文學品藻賞譽等篇。國文教員可爲參攷書。其全部又可爲歷史教員之參攷書。至政事爲官僚之圭臬。言語爲議員之南鍼。賢媛爲閨閣之良師。捷悟爲軍人之鴻寶。乃其餘事也。

一王丹麓所著今世說。詳載清初之事。辭意雋永。妙並臨川。是書采錄數十則。意在宏暢宗風。非敢掠美。

一昔人因文網嚴密。深自韜晦。往往談鬼說狐。妙託於寓言詭諫。

之列。或則歌功頌德。自附於奴顏婢膝之儔。茲編於怪誕離奇。幽冥果報之說。及帝后達官無謂之諛詞。概不採錄。

一當代名流。高僧閨秀。寄來事略及詩文。有爲時略後者。不及錄入。是編擬俟收輯稍多。再編續新世說一書。以餉閱者。

一孝標之注世說。旁徵博引。幾至二百餘種。京寓書籍無多。於名人履歷。多注未詳者。尙期海內大雅君子。有以教之。

新世說目錄

卷一

德行

言語

卷二

政事

文學

卷三

方正

雅量

識鑒

賞譽

品藻

卷四

規箴

捷悟

夙慧

豪爽

容止

自新

卷五

企羨

傷逝

棲逸

賢媛

術解

卷六

巧藝

寵禮

任誕

簡傲

卷七

排調

輕詆

假譎

黜免

儉嗇

汰侈

卷八

忿狷

讒險

尤悔

紕漏

惑溺

仇隙

新世說卷一

易宗夔撰述

德行第一

孫鍾元少居京師。與左光斗、魏大中、周順昌相砥以學行。居父母憂。率昆弟苦塊倚廬。六年如一日。學使者李蕃疏以純孝表其門。家故貧。嘗與鹿忠節論學。自晨至日昃。厪得豆麪作糜。怡然無不足之色。

孫名奇。逢直隸容城人。年十七舉於鄉。既乃潛心濂洛諸儒之學。鼎革後。前後十一徵不起。天下士識與不識皆稱曰徵君。晚歲渡河。慕蘇門百泉之勝。遂移家築於夏峯。聚徒講學。公卿持使節過衛源。輒屏驕從。以一見先生爲快。

李中孚純孝博學。晚歲名益高。中朝必欲致之。公臥稱疾篤。縣官舁其牀至省。大吏親勸於牀前。公絕粒六日。至欲自刎。迺得予假。

治疾歸而歎曰。生我名者殺我身。是皆洗心未密。不能自晦之所致爾。自是荆扉反鎖。不與人接。顧亭林至則款之。

李名顯。陝西盩厔人。年十六。粗解文義。父從軍死。母夫人日言忠孝節義事。以督之。稍長。以昌明聖學爲己任。縱覽經史百家。至二氏之書。晚年篤守程朱。於是關中士爭向先生問學。自署爲二曲土室。病夫云。

黃太冲自言受學劉念臺時。頗喜相尚。以氣節送經患難。漸造於深純。乃追恨爲過時之學。晚年固辭徵聘。徐元文學士延公子百家纂修明史。公報以書。且諧之曰。昔聞首陽二老。託孤於尚父。遂得三年食薇。顏色不壞。吾今遣子從公。可以置我矣。

黃名宗。義一稱梨洲。浙江餘姚人。明御史忠端公尊素長子。忠端以劾魏闖死。詔獄公年十九。入都。訟父冤。得雪。名滿天下。益肆力於學。經史百家無所不窺。晚歲乃以濂洛之統。綜會諸家。橫渠之禮教。康節之象數。東萊之文獻。艮齋止齋之經術。水心之文章。莫不旁推交通。自來儒林所未有也。